

李文忠公奏稿

李文忠公奏稿

卷之五十六目錄

遵議維持商局摺

光緒十二年正月二十一日

酌定鐵甲船人數餉數摺

光緒十二年二月初九日

駁復疏河轉地杼無用片

光緒十二年二月初九日

請給洋員寶星片

光緒十二年二月初九日
附清單

日意格陳季同請獎片

光緒十二年二月初九日

請給恆甯生寶星片

光緒十二年二月初九日

請開復王永勝原銜片

光緒十二年二月初九日

覆陳長蘆裕利摺

光緒十二年二月十二日

籌辦奉天吉林電綫片

光緒十二年三月十五日

復價減收展限片

光緒十二年三月十五日

請獎代訂鐵艦洋員捐

光緒十二年三月十五日

滇粵邊界通商議約捐

光緒十二年三月二十二日

李文忠公奏稿卷五十六

全集一之五十六

桐城吳汝綸編錄

遵議維持商局摺

光緒十二年正月二十一日

奏爲遵議維持招商局事宜以保中國權利恭摺仰祈

聖鑒事竊臣等欽奉光緒十一年九月十二日

寄諭順天府代遞道員葉廷眷條陳內扶持商局一條據稱請准

招商局輪船裝運鄂鹽該局承運漕糧請照沙船回空免稅章程

辦理並展緩運漕限期藉各貨水腳補其不足湖北帽合茶酌減

稅課歸局裝運等語所陳各節係專爲維持商務起見惟於各該

省辦政稅釐有無關係著李鴻章曾國荃體察情形籌商奏明辦

理至該局事務應否令蘇松糧道及江海關道就近會商並著酌

議具奏等因欽此遵卽分行各該司道等體察籌商去後旋據議

設前來緬維輪船招商局之設原因各口通商以來中國沿江沿海之利盡爲外國商輪侵佔故設法招集華股特創此局以與洋商爭衡庶遂漸收回權利所關於

國家體制華民生計極巨亦實爲中外交涉之大端惟船棧碼頭各項成本甚重與洋商分攬客貨常年所得水腳無多且洋商心懷嫉忌屢次跌價傾擠上年又遭法兵之擾海舶難行遂致局本虧遞虧折該員等無法支拄不得不暫借洋債以濟急需當此局勢岌岌之際必須官爲維持乃可日就起色葉廷眷所陳各節頗有見地但局船裝運鄂鹽及展緩運漕限期兩條不無窒礙應無庸議其運漕局船回空照沙船免稅一條查運漕沙甯船回空凡在北洋三口裝載豆貨雜糧等項向准全免出口稅在案局船本可照辦惟恐免稅較多於稅餉有礙飭據津海山海東海江海關

道議復嗣後商局輪船運漕回空請免北洋三口出口稅二成如
原來裝米一千石回空時免收出口貨稅二百石查照派運米數
通扯免足二成仍較沙甯船少免八成以示區別又湖北帽合茶
一條飭據津海江漢關道復稱帽合茶向由鄂豫內地運赴
張家口蒙古地方粗枝大葉價值最輕嗣後如華商由鄂附搭商
局輪船出口請照磚茶之例每百斤減爲出口正稅銀六錢並免
復進口半稅庶局船藉得水腳他船不得攪載其由津北運張家
口外仍照完沿途內地稅釐以上兩條應請均自本年開辦起片
將執照保單及稽核章程核定分飭遵照惟葉廷眷原請各條以
運鹽爲大宗今運鹽既有窒礙僅運漕回空免稅二成及裝運帽
合茶兩項尙可酌准綜計所沾利益每年不過合銀二萬兩左右
局累既深實不足以資補救查該局奏定章程原擬藉運漕水腳

以補攬載客貨之不足局中有此津貼方可與洋商爭衡而不爲傾擠前曾議明局船應得水腳悉照沙甯船定章每石實銀五錢六分零未幾又有扣減上年美商旗昌與英商怡和太古輪船承運酒糧減爲三錢五分實則支用不敷皆各虧本夫彼族之甘認此虧而爭運者蓋明知洋輪運漕可暫而不可久華商力量微薄藉以去其運漕津貼將立見傾覆而江海輪船之利仍可專歸於洋商耳其心計極爲狡狠若不杜其覬覦則華商之氣益餒洋商之欲益張恐中國商務一蹶不可復振

朝廷視華商之輪船與沙甯船原無軒輊現在沙甯船運漕每石應支銀四錢三分一釐零所有本屆商局輪船運漕應請仍照沙甯船現領之數支給以後一體照辦不再區分扣減亦不扣海運局公費以免虧賠而資津貼輪船運漕較沙甯船多一保險及麻

錢之費其修費亦大今支款照沙甯船一律庶昭平允且轉運迅速不致久存船內卽有蒸變遇險又可取償是於公家亦殊有益湖北湖南江西采辦漕米飭由該局代購運交其運費亦應照四錢三分一釐零核給俾無歧異又該局原存各省官本及光緒二年買併旗昌船棧案內前南洋大臣沈葆楨奏撥官本未還銀一百七十八萬餘兩於光緒六年奏明由運漕水腳項下分年扣還其時局中借欠商款有限遂議先還官本尙屬急公今計歷年扣還並湖北軍需扣款業已過半外尙應還銀七十七萬餘兩而該局現欠洋債計有一百餘萬兩若令官本洋債一併拔還商力萬不能逮查所賸各省官本七十餘萬內本有開款亦非急不可待應請暫緩拔還免扣水腳各項以示體恤俟洋債歸結後卽責令分年籌繳官本不准短少庶免失信外人亦不致同時催逼舉動

全局查泰西各國商務多由國家出費補貼即日本新定輪船公司章程議明十五年閒由政府保認商民股本按年八釐利息該公司向來所負之債並歸政府股分內所得子金償還誠以商務興廢關係國計強弱必相與維持於不敝中國帑藏非裕趨尙不同若保認商民官利代還債負勢有不能自應妥籌可行之策今所擬運酒水腳仍照沙甯船之數並無增益其回空免稅則較沙甯船核減卅合茶減稅甚微官本僅止緩繳實於公家並無甚損而該局商困藉可少舒事關中國商務要端非此斷不足以敵洋商而保我權利相應仰懇

特恩俯准照辦以作商民之氣大局幸甚至該局自去秋向旗昌收回後已遴派道員盛宣懷認真整頓經理嚴定章程力除弊竇務使商民信從可資經久江海津海關道本飭隨時會籌局務應

併令江蘇糧道與江海關道遇有要件隨時會同局員等商協助俾資利便所有遵議緣由臣等往返商推意見相同謹合詞陳請伏乞

皇太后

皇上聖鑒訓示遵行謹

奏

酌定鐵甲船人數餉數摺

光緒十二年二月初九日

奏爲酌定新到鐵甲鋼甲船人數餉數照章赴海軍衙門支領恭摺仰祈

聖鑒事竊前在德國訂造定遠鎮遠鐵甲船二隻濟遠鋼甲快船一隻雇用德國弁役駕駛來華於上年九月先後到沽經臣親赴海外駛驗詳細奏報所有三艦管駕暨大二三副管輪鍋爐升火人等均挑選素在兵船之學生及船廠當差之熟手以資得力並酌留德國員弁分派教練隨摺聲明在案一面督飭統領水師天津鎮總兵丁汝昌將三艦自管駕以次人數逐一酌定分別調派募補足額計定遠鎮遠兩艦各配設官弁匠役三百三十一員名各月支薪糧公費銀五千七百十一兩咸支醫藥費銀各三百兩濟遠艦配設官弁匠役二百四員名月支薪糧公費銀三千四百

八十九兩歲支醫藥費銀二百兩均自光緒十一年十月初一日起支又三艦共酌留德國原來員弁及機器管輪人等四十三員名月支薪餉銀六千三百六兩內憤舒一員已故現存四十二員月支銀六千二百二十六兩均照合同按西曆月分起支除上年十二月以前用款已由北洋海防經費項下支給外其自本年正月起應需三艦經費昨准海軍衙門王大臣函商由該衙門現存洋款內月發屬將一年應支總數若干覈定平數咨明派員赴京承領用供要需其未能豫計各用項隨時咨領等因當查三艦薪糧公費醫藥費一年共應領庫平銀十七萬九千七百三十二兩內薪糧應扣小建及平餘銀兩俟發給時分別核扣年終彙冊開報作正列收又煤斤修費及隨時添購物件並旗幟號衣等項每年約十餘萬兩應先請領庫平銀五萬兩存備撥用據實開報至

教習洋員尙須查看情形酌量留遣久暫無定所支薪餉並非常
年額定支款應暫歸北洋經費內領支俟合同期滿分別去留每
艦酌定員數再歸入三艦經費彙領已緘覆海軍衙門在案此項
戰艦爲中國向所未有一切規模皆屬創始現在名額薪餉雖經
酌定將來如須斟酌損益再行隨時咨報立案除訂造該三艦價
銀並駕駛來華德國弁役往返薪工川資等項俟出使大臣截算
清楚咨覆到日再行核辦並將三艦酌定人數餉數開單分咨總
理海軍衙門各國事務衙門戶兵工部一面派員赴海軍衙門請
領銀兩外理合恭摺具陳伏乞

皇太后

皇上聖鑒敕下各衙門查照再定遠鎮遠兩艦有隨帶魚雷艇各
兩艘其應配官弁人等俟配設齊全定准員名薪餉數目再行分

奏
咨立案合併聲明謹

覈覆疏河轉地桴無用片

光緒十二年二月初九日

再欽奉上年九月初八日

寄諭都察院代遞教諭謝鼎卿條陳擬造疏河轉地桴是否可用
著李鴻章酌覈具奏等因欽此當飭永定天津通永各河道並熟
悉河工之津海關道周馥候補道金福曾詳細查議旋據該道等
覆稱直省永定南北運漳沱等河挾雜泥沙皆極渾濁盛漲時奔
騰浩瀚其沙泥尚可隨溜而下漲過則水平力弱節節停滯從前
曾用混江龍鐵掃帚等器疏導但水大難於施用水小又隨起隨
淤難獲實濟轉地桴名目雖異而意在借物攻沙仍用水力實與
混江龍鐵掃帚大致相同聞山東試行無效業經停辦若用之直
省各河亦無把握等情又經咨詢山東茲准撫臣陳士杰覆稱前
據候選縣丞謝立裘稟造轉地桴三具派員如法搭繫船尾放入

黃河於深水淺水處一再試驗水深則懸空無著水淺則膠滯難行再於沙灘竭力拖試雖桴齒鑿沙計可數寸而隨起隨淤仍無裨益黃河水過沙停轉瞬積厚數尺尤非此桴所可見功且須三四十人牽挽而行徒費工力難收成效據河工局司道議請毋庸添造以節糜費咨覆前來臣復核皆係實情自應無庸置議理合附片覆陳伏乞

聖鑒謹

奏

請給洋員寶星片

光緒十二年二月初九日

再准出使法德等國大臣許景澄咨開閩廠第二屆出洋肄業生徒自光緒八年正月到洋經華洋監督酌核分送英國格林尼址學堂暨法國鎗礮火藥各官學肄業現在已滿三年屢經各官學監督教習考試入選出具文憑陸續咨送回華茲據洋監督日意格稟請將指授生徒尤爲出力之各官學洋員監督教習等照案酌給獎敘計總兵布士等五員均擬給二等第三寶星砲藥官學監督沙富一員擬給三等第一寶星官醫福爾肅等二員武弁布依生等三員均擬給三等第三寶星副監工排白德等四員均擬給四品軍功頂戴並三錢重數金賞牌咨請核辦前來臣等查第一屆曾保出力洋員四十一員此次生徒減少僅擬保十五員尙屬核實內惟布依生等七員領過薪水其餘均無薪費效忠盡力

無非希冀榮名自應照案給獎以酬勞勩謹照開銜名清單仰懇
天恩照擬給獎如蒙

俞允仍由船政局分別如式製造寄交許景澄頒給除咨總理衙
門知照英法駐京使臣外所有洋員教導出洋生徒請給寶星功
牌緣由謹會同南洋大臣兩江督臣曾國荃署船政大臣裴蔭森
附片具陳伏乞

聖鑒訓示謹

奏

謹將英法等國教導肄業生徒尤爲出力各洋員擬請獎勵
開具銜名清單恭呈

御覽

計開

法國豐屯卜洛官學總辦前管帶第一軍礮營總兵布士

法國兵部一等砲藥總稽查莫盧阿

比國色梭廠總監督沙都安

英國格林尼址官學總辦尼文

法國嘉里礮廠總監督副將榜日

以上五員擬請

賞二等第三寶星

法國砲藥官學監督兼總監工沙富擬請

賞三等第一寶星

法國豐屯卜洛官學官醫福爾聶

法國豐屯卜洛官學教習礮隊都司布依生

比國幫教習礮隊守備渠威烈

比國幫教習礮隊守備德基士

比國醫士波賴

以上五員擬請

賞三等第三寶星

硝藥副監工排白德

硝藥副監工氏布多

硝藥副監工台斐司

橋路副監工布阿生

以上四員擬請

賞四品軍功頂戴並三錢重整金寶牌

日意格陳季同請獎片

光緒十二年二月初九日

再准出使法德等國大臣許景澄咨開船政第二屆出洋肄業生徒現已期滿學成回華業將英法等國官學教習洋員另行咨請奏獎其使館出力各員及原派之洋監督亦應分別給獎除參贊官舒文朱宗祥在事未及三年應行存記外擬請將尤爲出力之二等參贊官總兵銜副將陳季同免補副將以總兵用至洋監督法員日意格上屆局務報滿據稱不敢邀獎惟自光緒三年第一屆生徒出洋迄今已九年之久凡酌派歷屆生徒分赴各廠肄業事宜以及往來川車飲饌醫藥無不一手經理實屬異常奮勉且於中法有事時辭退月支薪水仍照料生徒肄業委曲周全不避嫌怨尤爲難得該洋員前曾蒙

賞正一品銜暨一等寶星在案現在寶星釐定新章請換給二等

寶星新示鼓勵等因前來臣等擬請將該洋員日意格照各國武職大員章程換給二等第三寶星與陳季同所請官階一併仰懇天恩俯准賞給以昭激勸謹會同南洋大臣兩江督臣曾國荃署船政大臣裴蔭森附片具陳伏乞

聖鑒訓示謹
奏

請給恆甯生寶星片

光緒十二年二月初九日

山丹國電報公司洋員恆甯生疊在中國襄辦各省電綫購料雇工教習徒匠歷著勞績前有洋員霍洛斯等於電綫案內出力業蒙

賞給三等第三寶星欽遵在案該洋員恆甯生事同一律出力較多擬懇

恩賞給三等第三寶星俾示鼓勵謹附片陳請伏乞

聖鑒訓示謹

奏

請開復王永勝原銜片

光緒十二年二月初九日

再已革遇缺提奏提督江西南贛鎮總兵王永勝前於防護朝鮮案內擇尤列保欽奉

諭旨允准嗣兵部議覆准其註銷永不敘用字樣所請開復原官原銜之處應毋庸議等因查該總兵上年隨同慶軍援護朝鮮實屬異常出力駐守旅順口礮臺督隊操防亦極認真去秋李昆應回國臣復奏派該總兵帶隊護送前往調停彈壓悉協機宜該國君臣深加敬禮朝鮮王致臣函內有王總兵老成和平可否即請派來等語朝鮮後患方長該總兵於該國山川阨塞形勢夙所諳悉設有緩急堪備征調之選若不假以虛榮稍示威重臨事難收指臂之助且從前被參各節多係傳聞並無實在證據今立功海外其勞勩實邁尋常合無仰懇

天恩准將已革遇缺提督江西南贛鎮總兵王永勝先行開
復原銜以昭激勸而資驅策出自

慈施理合附片具陳伏乞
聖鑒訓示謹

奏

覆陳長蘆帑利摺

光緒十二年二月十二日

奏爲內務府催提長蘆帑利並無徵存銀兩現經竭力墊解以濟要需恭摺仰祈

聖鑒事竊臣欽奉正月十八日

寄諭內務府奏恭備要差懇飭催欠款一摺著籌解銀二十萬兩等因欽此當飭運司李邦楨籌撥已先挪湊銀一萬兩於二月初六日起解在案正在續籌間欽奉二月初十日

諭旨嚴催速解遵查長蘆應解內務府帑利原係承領帑本各商應交之款嗣於道光二十八年經

欽派王大臣清查鹽務因承領帑本各商已參革物故無可著追將每年應解利銀議歸現有各商攤繳本已名實不符歷年水旱頻仍引鹽運艱銷滯成本加重商累甚深臣督飭運司設法整頓

近來應徵正課已有起色蓋課款爲京奉各餉所繫不得不首先催完其帑利既係代賠之款商力又萬不能逮是以仍不免積欠然自道光二十八年至上年止實計現商僅欠交銀十三萬餘兩並無二百三十餘萬兩之多內務府原奏之數似連遠年參商未完並減引停攤及懸岸無著等款併計在內溯查歷屆恭備

大差奉

旨飭提此項帑利十萬兩或二十萬兩而向解之銀僅數千兩及一萬兩不等皆係通融挪墊統計墊數已鉅迄今尙未徵起歸補臣深知

皇太后

皇上謁

陵典禮重大此次內務府待用孔亟前於奉

旨後卽飭運司籌墊委解並先咨報內務府查照曷敢任意玩延
惟帑利本款除歷年儘徵儘解外實無餘存在庫現正各商春運
喫緊之際情形艱窘無力續完運庫本無閒款又不敢挪動正課
致礙京奉各餉茲復與運司李邦楨再三籌湊萬不得已惟有將
本年應解內務府各項帑利暫於運庫待發兵餉各款內移緩就
急竭力墊撥銀三萬兩趕緊傾鎔定於十六日委員解赴內務府
交納以濟要需連前共解銀四萬兩較歷屆

大差解數增至數倍實已不遺餘力仍俟徵起本年帑利再歸墊
銀三萬兩並俟徵起節年帑利陸續歸墊前解一萬兩暨上數屆
墊解之款庶內務府藉可應急而庫款亦免久懸理合恭摺由驛
覆陳伏乞

皇太后

皇上聖鑒謹奏

籌辦奉天吉林電綫片

光緒十二年三月十五日

再欽奉

諭旨籌辦奉天至吉林琿春一帶陸路電綫前已飭據總辦電報道員盛宣懷遴委三品銜湖南補用知府周冕馳往詳細查勘道路並派各員轉運綫料此項設綫工程關係重要必須專派熟悉電務之大員督率華洋員匠妥為經理查有鹽運使銜直隸候補道余昌宇幹練耐勞奮發有為歷辦津滬蘇浙閩粵各省並朝鮮電工均稱妥速經費亦能節省堪以總辦吉林等處設綫事宜即令馳往催集料物先從奉天至吉林一路辦起節節前進隨時稟商

盛京吉林各將軍及臣處核飭妥辦並刊給木質關防以昭信守一切應用經費料物仍由盛宣懷妥籌接濟除咨行外理合附片

陳明伏乞

聖鑒謹

奏

復價減收展限片

光緒十二年三月十五日

再長蘆軍需復價一款係各商按引攤交以助津省軍餉前因商情困苦於同治十二年奏准減交凡外商每引應交銀五錢者減爲四錢京商每引應交銀二錢五分者減爲二錢光緒八年限滿奏准展限三年扣至十一年底又屆限滿當飭按照原額徵收茲據長蘆運司李邦楨詳稱此項復價關係津省餉需苟能照額全完斷不稍任延宕惟蘆綱疲累已久攤交帑利等款過多商力實形竭蹶且頻經災歉地出硝鹽官引滯銷難復賣鹽之價各商購運成本愈重近年每屆正課皆比從前加數完交復價一項本係額外之款非正課可比現照減定銀數交納已覺力不能支若遽令照額全完殊慮掣動大局查津省軍餉每年共應解銀二十萬兩以近年出庫引目牽算約在五十餘萬道按外引四錢京引二

錢核計歲約收銀二十萬兩有奇可敷分解請將京外各商應交軍需復價一款再展限三年仍照原減銀數隨引完交備以後出庫引目較少收不敷解應令各商設法籌繳足數以顧軍餉等情請奏前來臣復核所詳確係實情應請自光緒十二年起展限三年照案減收以示體恤而免貽誤正課理合附片具陳伏乞聖鑒敕部知照謹

奏

請獎代訂鐵艦洋員摺

光緒十二年三月十五日

奏爲北洋前在德國訂造鐵艦出力洋員擇尤酌請獎勵恭摺仰祈

聖鑒事竊光緒六年在德國伏耳鏗廠訂造定遠鐵甲一艦旋又訂造鎮遠鐵甲一艦濟遠鋼甲一艦並大小雷艇十艘粵省大雷艇二艘已一律工竣回華奏報在案查中國在外洋訂造鐵艦本係創舉必須該國海部相助方能精堅合用今三艦及十二艇凡定式驗料監工及製汽機試速率考礮位魚雷等事皆由出使大臣與該國海部大員隨時商籌遴派熟諳洋員幫同料理久著勤勞各艦回華時又商借船主教習駕駛該海部各員均不支領薪費而能畛域無分顧全睦誼效忠盡力洵屬可嘉現在續造兩艦仍須德員相助自應獎敘前勞俾資觀感准出使德國大臣許

景澄擢其尤爲出力者士叨司等九員擬給寶星等第咨會前來
臣覆核並無冒濫謹繕單恭呈

御覽仰懇

天恩俯准照擬賞給寶星

敕下總理各國事務衙門按照等第製給印發執照寄交許景澄
祇領分別頒給以示鼓勵理合恭摺具

奏伏乞

皇太后

皇上聖鑒訓示謹

奏

謹將訂造鐵艦案內尤爲出力之德國海部洋員擬請獎勵
開具銜名清單恭呈

御覽

計開

前任海部大臣士叻司現任海部大臣喀必里微二員擬照各國
總理部務大臣之例

賞給頭等第三寶星

現任海部總辦的脫里西又勃立克司又古而忒又克閭格耳又
湯姆生又薩克以上六員與各國總稅務司同品擬請

賞給二等第二寶星

現任海部總監工洛脫耳與各國副領事官同品擬請

賞給三等第二寶星

滇粵邊界通商議約摺

光緒十二年三月二十二日

奏爲與法國使臣會議滇粵邊界陸路通商章程畫押竣事恭摺
仰祈

聖鑒事竊臣欽奉光緒十一年八月十一日

上諭總理各國事務衙門奏法國使臣來華請派員會議通商章程一摺已另有諭旨派李鴻章爲全權大臣矣此次中法議立滇粵陸路通商章程事係創辦該大臣務當悉心籌畫詳細商議總期周密妥善免致將來窒礙等因欽此仰見

聖謨閎遠

訓示周詳莫名欽感嗣於上年十一月開法國使臣艾可當擬具章程二十四條呈經總理衙門王大臣逐條駁駁函商到臣經臣督飭津海關道周馥另擬章程十八條緘請總理衙門核奪作爲

底本十二月初五日艾可當帶同參贊等官來津拜晤當將底本交閱彼此意見懸殊面談數次萬難就緒艾可當因與臣商訂彼此各派員先行會議大略其關緊要及所執各異之處再行面商臣派津海關道周馥候選道伍廷芳候補知州朱幹臣艾可當派參贊卜法德繙譯微席葉各將彼此稿本逐條辯論自上年十二月十二日起至本年正月十七日止疊據周馥等與卜法德微席葉會商多次將彼此稿本分別刪改另訂章程十九條臣復於本年正月十九二十三二十七三十二月初六初九等日面與艾可當詳晰辯論舌敝脣焦始得粗有規模經臣鈔稿寄呈總理衙門在案竊惟滇粵陸路通商事係創辦敢不懍遵

聖訓悉心籌畫詳細商議惟此次訂章既不能稍違上年四月之新約尤不能與咸豐八年舊約相背彼此防損取益之處各有援

引每因一字一句辯論多日難就範圍其在彼所最著意者通商處所不能僅指兩處雲南廣西省城須派領事往駐又進出口洋土貨稅須較各口減半徵收並求在滇粵地方開礦及製造土貨運越南食鹽數大端皆於彼商務有益意在必行爭之甚力臣以新約第五款雖有貿易限定若干處日後定奪之語而下文仍載明邊界通商處所指定兩處字樣目前斷不能另有增添該使謂中國在北圻各大城鎮設立領事照新約須與法國商酌如中國許彼派領事駐雲南廣西省城則中國在北圻城鎮設領事亦易商辦臣以通商口岸設領事原爲照料本國商民而設滇桂省城係屬內地實不便設立領事該使又請將邊界領事准其每年分駐省城數月察看商務臣亦堅不允行該使詞屈理窮只以中國在北圻城鎮派領事一節執定新約內商酌二字囒囒置辯臣思

中國此時本不必多派領事徒增耗費因卽於第二款訂明先在河內海防二處設立領事其餘各大城鎮隨後酌派尙可操縱由我至開礦製造運鹽各節通商以來各國覬覦已久屢經總理衙門辯阻未行該使欲於章程內添此數條意在決我藩籬攘奪華民生計事關中國內政須保我自主之權屢經嚴詞拒絕該使仍以舉有外部訓條必將在口製造一節添入與臣再四磋商力執不允該使因請於第三款內法國商民前來通商均照咸豐八年五月十七日中法條約句下添入第七一款蓋咸豐八年約內第七款有工作二字彼欲藉此以塞外部之意既是援引舊約自不便拒之過甚況自咸豐八年立約迄今已三十年法商並無因工作二字在各口開設製造各廠則滇粵邊界地方亦必不能藉詞設廠製造此法使要求各節均經詳細辯駁之大略也至減稅一

節該使初議照現行稅則減徵一半其估價之貨向按值百抽五
者改爲值百抽二兩五錢臣以新約第六款所載進出邊界應納
各稅照現在通商稅則較減之語不過稍爲減輕詎能驟減一半
只允按照現行稅則減去五分之一其估價之貨援照俄國陸路
章程仍應值百抽五不能照減該使謂俄國陸路稅則係照各海
關三分減一法國事同一律厚彼薄此深恐貽笑鄰邦臣謂北圻
與俄國道途遠近懸殊不能比例辯論數日該使悻悻形於詞色
罷議而去當經臣商准總理衙門電覆由臣酌量辦理細查泰西
各國通例大都進口稅重出口稅輕無非爲暢銷土貨起見中國
通商之始未請各國情形所定稅則進出口均係一律所以洋貨
暢銷土貨滯銷但因約章久定不能設法挽回滇桂地方瘠苦物
產不豐值此邊界通商尤須維持小民生計以期商務漸旺稅課

日增因與支可當籌商定爲出口貨照稅則三分減一進口貨照稅則五分減一若估價之貨爲稅則所未載者無論進出口仍照值百抽五徵收至洋土各貨赴內地買賣應完子口稅仍照通行章程辦理不在減徵之列該使已一一遵允均於第六第七兩條載明如此變通辦理庶滇桂土貨可冀暢銷將來如欲修改各國條約加重進口減輕出口各稅亦可發端於此此分別減稅應輕應重之要端也至於在我所應爭者其大要亦有數端一爲水陸稅關分清界限查此次陸路通商酌減稅項係專爲雲南廣西邊界而設新約第六款既有與通商各口無涉一語自應切實照行以免虧損現於第八第九兩條載明洋土各貨凡在邊關已完稅項復轉運通商各海關者均照海關稅則月收正稅不准以邊關單作抵其在邊關所領存票亦只准在邊關抵稅概不發還現銀

各守定章可以杜絕一切影射悞囑等弊至洋藥一項新約載明
月議專條臣查洋藥流毒已久俄美諸國已議不准販運即英國
現議稅釐併徵新章無非寓禁於徵之意聞法人欲於越南廣種
罌粟而緬甸新併於英亦恐洋藥從西侵入偷漏更多因於第十
四條載明洋土各藥均不准販運買賣至互交逃犯新約亦載明
月議專條查中西律例不同交犯最多糾葛現於第十七款內載
明儻有中國人照中國律例無論犯何罪名照會領事官設法拘
送庶免藉詞庇匿又僑居越南華民近日頗有以法人徵收身稅
爲苦者臣力與辯駁該使電告本國許以從寬辦理請不必載入
章程因於第四款載明中國人身家財產法國應與最優待西國
之人一律不得有異又於第十六款內載明命案賦稅詞訟等件
均與法國相待最優之國之商民無異等語以爲將來辯論地步

至土司苗蠻地方慮洋人前往游歷滋事准於請護照時載明不能保護其通商處所洋人游歷在百里以內向不請照今改以五十里爲限又洋人自用免稅各物舊約漫無限制今更嚴切聲明必係洋人自用數目無多方准免稅如入內地仍照舊章徵稅其餘各條有參照舊約者有較舊約稍便宜者均經再四商辯期於得寸則寸內惟第十一十二兩條係法人在越南收稅辦法臣與詳細推敲附於此次章程之內亦爲保衛在越華商張本但恐愚慮所及或有未周復將會議章程寄交總理衙門王大臣覆核進呈

御覽旋奉電覆章程進呈無改希細酌字句照辦等因近日戈可當又函飭駐津領事林椿疊次謁商請將廣西通商處所先定載入章程臣以界務未定不能遽許該使遂請在第一條註語內聲

明諒山以北本年內擇定通商處所字樣以期早日開辦經臣電
商總理衙門允行該使來津諄催畫押因將稿本發給飭由津海
關道周馥稅務司德璀琳督同中西繕譯各員詳細校對無訛於
三月二十二日齊集公所將中法文章程四分會同畫押鈐印竣
事彼此各存正副本二分伏查此次議訂章程自去冬迄今四月
於茲往復折辯詳細電商其要求過甚者絕不敢稍予通融而舊
日約章所准者亦未便概行拒絕相機因應繁費經營皆由稟承
廟謨隨事與諸王大臣和衷商榷得以從容成議而此後恪守定
章認真籌辦弭患無形是尤在總理衙門暨滇粵各督撫臣之操
縱得宜也謹將章程正本封送軍機處進呈恭候

臣批准以便屆時互換其副本咨送總理衙門查核臣原奉全權大

諭旨一道敬謹咨繳軍機處備查所有商辦法國在滇粵邊界陸路通商章程畫押竣事緣由謹繕摺由驛馳奏伏乞

皇太后

皇上聖鑒訓示謹

奏

商約十九款

大清國

大法民主國

前於光緒十一年四月二十七日即西歷一千八百八十五年六月初九日立定條約第六款內開北圻與中國之雲南廣西廣東各省陸路通商章程兩國派員會議另定條款附在本約之後又第十款內開中法兩國前訂立各條約章程除由現議更張外其餘仍應一體遵守等語是以

大清國

大皇帝欽差全權大臣太子太傅文華殿大學士北洋通商大臣會辦海軍事務直隸總督一等肅毅伯爵李

大法民主國

大總理璽天德欽差出使中國全權大臣御賜佩帶榮光四等寶

星並義國冠冕二等大星外務部交涉科侍郎戈

欽差頭等領事官幫辦議約事務御賜佩帶瑞典國巨斯達霍薩

三等寶星並比國禮阿波勒德五等寶星卜

各將所奉全權文憑互相校閱均屬妥協議定條款如左

第一款

一兩國議定按照新約第五款現今指定兩處一在保勝以上某

處一在諒山以北某處中國在此設關通商允許法國即在此兩

處設立領事官該法國領事官應得權利即照中國待最優之國

領事官無異現在條款畫押時兩國勘界大臣尚未定議其諒山

大臣互商擇定至保勝以上應開通商處所亦俟兩國勘界定後再行商訂

第二款

一中國可在河內海防二處設立領事官隨後與法國商酌在北

圻他處各大城鎮派領事官駐紮至法國待此等領事官並該領事官應得權利即照法國待最優之國領事官無異其所辦公事應與法國所派保護之大員商辦

第三款

一兩國議定於彼此派領事官前來駐紮時所住公館由兩國地方官相幫照拂至法國商民前來中國邊界通商處所均照咸豐八年五月十七日中法條約第七第十十一十二等款辦理越南人到中國邊界通商處所中國亦一體優待

第四款

一越南各地方聽中國人置地建屋開設行棧其身家財產俱得保護安穩決不刻待拘束與最優待四國之人一律不得有異中國官商所寄往來公文書信電報經法國郵政電報各局一律遞

送並不阻止中國待法國人亦照此一律優待

第五款

一法國人及法國所保護人與別國居住北圻人等欲行過界入中國者法國官查明係體面之人即請中國邊界官員發給護照准其執持前往回日將照繳銷每遇領照之人如必應路過土司苗蠻地方應先在照上寫明該處無中國官不能保護至有中國內地人民欲從陸路由中國入越南者應由中國官查明係體面之人請法國官發給護照一如法國人入中國邊界辦法至彼此所給護照皆只爲游歷而用不准作爲買賣貨物免稅憑據凡有人民之未領有護照而過邊界者其在中國則聽中國地方官扣留其在北圻則聽法國官員扣留彼此即交各本國官酌量情形審辦至僑居越南之中國人民由北圻回中國者只由中國官

自發憑單准其過界若邊界通商處所法國人等有出外遊歷者地在五十里內毋庸請照

第六款

一凡進口之貨由法國商民及法國保護之人運至邊界通商處所已納進口稅即可照善後章程第七款及各海關通行運洋貨入內地稅單之定章准其入中國內地銷與凡各項洋貨進雲南廣西某兩處邊關者於到關時即將貨色件數及運貨人姓名報明由關派人查驗屬實按照中國通商海關稅則減五分之一收納正稅如稅則未載即按估價值百抽五徵收正稅須俟正稅完清後方准起棧過載出售如該商願將洋貨運入內地須再報關照通商各海關稅則收納內地子口稅不得援減五分之一之正稅折半徵收此項子口稅完清後山關發給稅單准其持往所指

之地方售賣凡過關卡概不重徵儼無稅單運入內地者應照土貨之例逢關納稅過卡抽釐

第七款

一凡法國商民及法國保護之人赴中國內地各處購買土貨運至邊界通商處所出入口北圻者均可照善後章程第七款運貨出口之例辦理凡各項土貨運出雲南廣西某兩處通商處所於到關時即將貨色件數及運貨人姓名報明由關派人查驗屬實如係該商先領三聯單自赴內地采買並未完過內地稅釐者應照中國通商各海關稅則先徵內地子口稅再照中國通商海關稅則減三分之一徵出口正稅如稅則未載即按估價值百抽五徵收正稅方准起棧過載販運出關儼該商入內地買土貨並未領有三聯單者所過內地關卡仍應照完稅釐由關卡發給單票

爲據其抵關時驗有內地稅釐單票始准免子口稅凡法商等進出雲南廣西兩邊關運貨之車輛牲口中國商民進出北圻運貨之車輛牲口彼此一體免收鈔銀其進關水路通舟楫之處彼此可照各海關例收納船鈔以上第六第七二款兩國議明日後倘有他國在中國西南各陸路邊界通商另有互訂稅則法國亦可一體辦理

第八款

一洋貨到此邊關已完進口正稅後復因不賣轉往彼邊關者如在三十六箇月限內驗明原貨並未拆動抽換則此邊關將已收之正稅發給免單准其持往彼邊關以抵應繳之稅或發給存銀票准其於三年內留抵下次應繳本關之稅概不發還現銀若將此洋貨轉入中國通商各口應照各海關洋貨進口例月收正稅

不准以此項邊關存票免單作抵亦不准以此項邊關已完之稅單作抵以免轉囑至已完內地子口稅仍照各口向章概不准發給存票免單

第九款

一土貨已在此邊關完過子口稅出口正稅復轉往彼邊關售賣者到彼邊關後只照原納正稅之數收復進口半稅但須照各口定章不准洋商販入內地儻將此土貨轉入通商各海口應概照各海關洋貨進口稅則一律辦理另徵正稅儻入內地仍完子口稅如有土貨出中國海口進越南海口復往中國邊界入關應照洋貨一律徵收正稅儻入內地仍完子口稅

第十款

一進出口之貨到中國邊關即請查驗不得逾十八箇時辰如逾

期不報每日罰銀五十兩惟此罰銀至多不得過二百兩凡過關報貨時若心存欺詐以多報少冀減其應納稅項查有確據即將貨物全罰人官若無關監督准單私自過關起卸繞路拆賣及一切有心偷漏等弊亦將貨物全罰人官凡有商人報關請領內地稅單心存欺詐或捏報貨物名色作數並所出所往之區不符者亦將貨物全罰入官至其如何審辦應照同治七年閏四月初八日章程辦理其罰令入官之貨如商人願將原貨作價交官准其與中國官按照原貨估價交官亦可至中國沿邊一帶凡有嚴防偷漏之法皆由中國官相度機宜隨時便宜設法辦理其中法以及越南船艇上下水道每過彼此邊關之時儘無單貨不符等弊可無庸卸貨登岸只由關遣差上船查驗

第十一款

一中國土貨由陸路入北圻者照法關稅則完納進口稅若係出口一概免稅日後法國在北圻另定稅則章程隨時知照中國僑北圻境內將來另定越南數種土貨製造及金銀保真等稅中國若有此等貨運入北圻亦應照徵

第十二款

一凡運土貨由中國此邊關路過北圻至中國彼邊關者或由兩邊關運出越南海口回中國者其過北圻時應照法關稅則完納過境稅均不得過貨值百抽二至此項貨物於出中國後應由法國邊關查驗給發貨單詳開貨物名色件數並所往之處等語該商人執此貨單每遇法官索驗即應沿途或抵海口後呈閱但此項土貨運入北圻後應先納進口正稅以防偷漏即由法關給發單照以便於抵海口或至邊界時呈驗並由法關在原納進口正

稅內扣去過境稅銀仍將餘銀給還則該商人即將前次已領之收稅單呈繳註銷惟此項土貨運過北圻既係新章備該商報法關時心存欺詐捏報貨物名色件數並所出所往之處不符查有確據者即將貨罰入官其罰令入官之貨如商人願將原貨作價交官准其與法國官按照原貨估價交官亦可至中國土貨出各海關運入越南海口過北圻進邊關者其在越南境內亦應照以上過境稅則一律辦理

第十三款

一凡有金銀外國各等銀錢麪粟米粉砂穀米麪餅熟肉熟菜牛奶酥牛油蜜餞外國衣服金銀首飾攪銀器香水碱炭柴薪外國蠟燭煙絲煙葉外國酒家用雜物船用雜物行李紙張筆墨氈毯鐵刀利器外國自用藥料玻璃器皿以上各物進出口由中國邊

關驗明確係外國所產洋人自用數目無多准給免稅單放行儻不報驗不請免稅單私自起運者照商貨走私例罰辦至若運往內地除金銀外國銀錢行李三項仍無庸議外其餘各貨即係洋人自用數目無多皆按稅則每貨值百兩完納內地子口稅銀二兩五錢凡中國人之出入北圻邊關者隨身所帶銀錢行李衣服首飾紙張筆墨書籍及自用家伙食物到法越關一概免稅至中國領事官所運自用各貨亦一律免稅

第十四款

一兩國議明洋藥土藥均不准由北圻與雲南廣東廣西之陸路邊界販運買賣

第十五款

一米穀等糧不准販運出中國邊關如係進關准其免稅至火藥

彈子大小鎗礮硝磺青白鉛一切軍器食鹽及各項有壞人心風俗之物均不准販運進關違者即查拏全罰入官其軍火各項如山中國官自行采辦或由商人特奉准買明文須由關查驗明確方准進關日後可由中國大員先商法國領事官准將兵器軍火過北圻運進邊界則法國關全行免稅至一切兵器軍火及各項有壞人心風俗之物亦不准販運進北圻

第十六款

一中國商民僑居越南所有命案賦稅詞訟等件均與法國相待最優之國之商民無異其在邊關通商處所華人與法人越南人詞訟案件歸中法官員會審至法國人及法國保護之人在通商處所如有犯大小等罪應查照咸豐八年條約第三十八三十九等款一律辦理

第十七款

一中國邊界某某通商處所儻有中國人民照中國律例無論犯何罪名逃入法國人或法國所保護人民寓所或商船隱匿者地方官照會領事官查明罪由卽設法拘送中國官審辦至中國人民因犯法逃往越南由中國官照會法國官訪查嚴拏查明實係罪犯交出照法國與別國所訂互交逃犯之約最優之章辦理其法國人民及法國保護之人犯法被告逃往中國者法國官照會中國官查明實係罪犯設法拘送交出法國官審辦彼此不得稍有庇匿

第十八款

一此次所訂陸路通商各款如有未詳備者應查照中國通商各海關章程與現在通行條約相符者辦理儻再有未訂之事應由

兩國官員各請示於本國以上各款將來如須續修卽照新約第八款所載換約後十年之期再行商訂

第十九款

一此次會議通商條款俟兩國

批准後應在中國法國及越南頒行週知一體遵守仍於畫押之後多至一年爲期在中國京都互換

李文忠公奏稿卷五十六

李文忠公奏稿

卷之五十七目錄

酌裁湖北武毅軍摺

光緒十二年四月初十日

邊地互市請免造估冊片

光緒十二年四月初十日

海關攤還息借洋款摺

光緒十二年四月初十日

王永勝請卹片

光緒十二年四月初十日

北洋月支礮費摺

光緒十二年四月初十日
附清單

覆陳部駁海防報銷摺

光緒十二年四月初十日

洋員資費請准銷片

光緒十二年四月初十日

移讓瀋池口教堂摺

光緒十二年四月二十八日
附合同

再請劉步蟾等獎敘片

光緒十二年五月初六日

請緩鹽課奏銷摺

光緒十二年五月初六日

奏保左翼黃片

光緒十二年五月三十日

宋慶裁軍薪餉片

光緒十二年五月三十日

張樹聲原籍建祠片

光緒十二年六月二十日

湊付洋息摺

光緒十二年七月十八日

官剝船仍請津貼摺

光緒十二年七月

代造剝船請改部議摺

光緒十二年七月

津關部款緩解片

光緒十二年八月

李文忠公奏稿卷五十七

全集一之五十七

桐城吳汝綸編錄

酌裁湖北武毅軍摺

光緒十二年四月初十日

奏爲湖北調防直隸武毅軍馬步四營現已酌裁馬步隊各一營以節餉需仍留步隊二營以順畿東門戶恭摺仰祈

聖鑒事竊前准署湖廣督臣裕祿咨稱湖北新舊防軍分別撤留

案內戶部以調防武毅軍四營應咨商直隸酌量情形奏明裁撤

等因當查武毅軍馬隊一營步隊三營本係直隸提臣李長樂舊

部歷剿粵捻久稱得力光緒六年畿境海防喫緊由湖北奏調來

直派紮蘆臺仍歸李長樂統領節制緣直餉無可籌措仍照章由

鄂省按月解濟每年合銀十數萬兩蘆臺爲畿東海濱門戶關繫

重要東至北塘北至山海關一帶地段縣長防營無幾甚賴該軍

協守以壯聲援上年直隸新募各軍先後撤遣海防更形空虛該軍人馬強壯器精藝熟正資捍衛要區本難輕議裁撤惟鄂省亦非寬裕近來月餉頻有延欠每遇緩急難濟之時暫由淮軍餉內設法挪墊但淮餉支絀萬分斷難長此墊給惟有將該軍酌裁藉資節省遂擬裁去馬步隊各一營仍留步隊二營庶事輕易舉鄂力尙可措辦而畿境海防亦得兼顧卽經緘商裕祿籌議旋准覆稱裁去馬步隊兩營核計減餉幾及一半以後所留步隊兩營月餉鄂中籌畫較易當督飭司局按數撥足源源解濟其未撤之先四營月餉及以前挪墊淮餉並當籌解歸款所需遣資卽飭解津其裝送遺勇商輪水腳由鄂兌付請一併核奏等因臣卽知照李長樂將應裁馬步隊兩營迅速妥爲撤遣一面收繳軍械號衣馬匹查該兩營勇丁共計七百數十人並員弁長夫馬夫人等內籍

隸湖南北安徽江蘇江西者人數較多應由津雇搭招商局輪船
分起送往上海再搭江輪分送漢口九江蕪湖鎮江等口仍派員
隨船約束分途押送回籍其餘籍隸東豫一帶應由陸路前進亦
即分派員弁押送不准沿途絲毫騷擾業於三月底四月初陸續
起程咨行經過地方官會同照料各弁勇等入隸該軍屢經征戰
勞苦出力本非新募可比今遠道遣去餘蓄毫無情殊可憫應酌
給四五六三箇月薪餉各項以爲路費俾到籍後略作謀生之資
免致流離失所所需此項遣餉及商輪水腳統由鄂省撥兌俟事
竣核明數目由該省彙案報銷現留兩營以後月餉暨以前直隸
墊款仍咨由湖北督撫飭令司局照數源源撥解以濟要需而
顧大局所有會商鄂省酌裁武毅軍兩營緣由理合恭摺具陳伏
乞

皇太后

皇上聖鑒敕部查照謹

奏

邊地互市請免造估冊片

光緒十二年四月初十日

再吉林與朝鮮互市於和龍峪西步江光輝峪建造局房渡船前
因邊地荒寒工料昂貴勢難繩以例價奏請實用實報事竣開單
咨部免其照例造冊估銷欽奉

諭旨允准旋准工部以與定章未符仍令先造估冊工竣報銷等
因當經咨行遵照茲據督理商務委員秦瑛稟稱和龍峪西步江
光輝峪地處極邊人煙絕少建造局房渡船事係初創物料須購
自省城相去千里其間重岡峻嶺道路崎嶇溪湖水窪消漲無定
購價既昂運費尤重所須工匠亦必由省雇覓遠道招徠價即增
貴且往返行路之日亦不得不按數給價方可樂從並須將其行
李器具量給車馬載往凡此例外之費皆宜隨時核酌不能預計
若先行估報寬則有浮開之費減則有賠累之虞邊地初辦工程

較吉林省城已雖較內地尤甚實未便以例餽相繩仍請實用實
銷免其先行估計造冊以省繁費由吉林將軍查明所稟確係實
情咨直會奏前來臣復核無異應請照擬辦理謹會同吉林將軍
臣希元附片具陳伏乞

聖鑒訓示敕部查照謹
奏

海關攤還息借洋款摺

光緒十二年四月初十日

奏爲津海關奉派攤還神機營前借洋款擬撥洋藥釐金暫行按期歸付息銀並已指還兩期息銀數目恭摺仰祈

聖鑒事竊准戶部咨開神機營息借洋款奏令江海津海東海江漢各關按期歸還一摺奉

旨依議欽此計津海關奉部派還本息銀一百五十七萬餘兩仍由江海關隨時照鎊價長落合銀付給每年分四期自光緒十一年八月二十三日第一年起至光緒二十一年五月初九日第十年第四期全數歸還等因當經飭據津海關道周馥安細籌辦詳復前來臣查津海關入款惟洋稅及洋藥釐金兩宗洋稅連招商局稅每年至多不過四十萬兩向分四成六成以四成專撥天津機器局爲製造各路軍火經費以六成內提一成半解充

出使經費又應坐支稅務司薪水本關經費其餘儘數撥歸支應局搭放大沽北塘海口各礮臺練兵月餉以上各款均關緊要而礮臺練軍製造洋軍火尤爲拱衛

畿輔根本要需不可一日缺乏歷年以來入不敷出是以機器局則添請部撥月款支應局則截留保定練餉以沾溉其不足實未便專顧洋債而置本地要防於不顧近歲遇有他項撥款無術籌應卽如光緒六七兩年指撥東北邊防餉迄今尙未能清解蓋限於力量之無可如何非敢稍有諉誤也此次神機營息借洋款指派津海關歸還本利按戶部原奏光緒十一年利銀一萬餘鎊合三萬五千餘兩十二年至十六年每年利銀二萬餘鎊合七萬餘兩十七年至二十一年每年本利銀六萬餘鎊至七萬餘鎊合二萬餘萬兩爲款甚鉅且鎊價隨時增長現計每年利銀已合八萬

餘兩之多較部文原數頓加揆之津關情形非特不能歸本卽每歲八萬餘兩利銀亦苦不易籌撥惟洋商索款甚急既經指撥又未敢延欠失信外人現與該關道通盤籌畫洋稅項下無論如何騰挪斷不能勻撥巨款惟洋藥釐金一項自上年四月初一日加捐以後每箱徵銀八十六兩現在箱數雖少日後若能起色以之歸付息銀或可藉資挹注除照部議津防兵餉輪船經費照舊每箱開支二十四兩又留支地方向有善舉等項十六兩外其餘每箱四十六兩應卽專款存儲以備歸還洋息如尙不敷祇可在洋稅運招商局稅內無論何款竭力搜索隨時湊解以期免誤期限儻以後洋藥改章或進口箱數過少再隨時察核辦理至光緒十七年以後每年帶利還本須銀二十餘萬兩按之鎊價爲數更多津關出入皆有定數部中按籍可稍實萬萬不能應付容再督飭

該關道等妥籌另行奏請改撥此不得不預爲聲明者至現在應還之銀查上年八月第一期利銀一萬七千六百四十兩業經神機營墊付應照部議陸續設法解還其上年十一月第二期利銀係怡和洋行墊付已據該行催索按戶部原奏每鎊作三兩五錢應合銀一萬七千六百四十兩惟鎊價增長據江海關道轉據英領事文稱應合銀二萬一百十二兩六分五釐六毫又該行墊付此款應另加利銀三百五十一兩九錢六分一釐二毫又今年二月第三期利銀應合銀二萬一百五十七兩九錢八分三釐五毫亦應迅速撥付以上二三兩期共合銀四萬六百二十二兩一分三毫較戶部原奏應添銀五千三百四十二兩一分三毫現收洋藥釐金項下爲數有限無可提解業飭洋藥商董暫向各商號挪借銀三萬五千二百八十兩解於關庫洋藥釐捐項下湊

撥銀五千三百四十二兩一分三毫解交江海關彙收歸付仍俟
徵起釐金再將商號借款扣還歸墊除將江海關道轉據英領事
來文應添銀數緣山咨部外所有津海關擬撥洋藥釐金暫行按
期歸付洋息緣由理合恭摺具

奏伏乞

皇太后

皇上聖鑒敕部查照謹

奏

王永勝請卹片

光緒十二年四月初十日

再開復原銜已革遇缺題奏提督江西南贛鎮總兵王永勝係程
學啟部下著名戰將同治初年臣督師赴滬隨同攻克青浦嘉定
太倉崑山蘇常嘉湖各城出奇入險所向克捷常州一役該總兵
身先士卒接刃登城其驍勇無前至今嘖嘖人口查江蘇肅清程
學啟戰功第一王永勝尤程學啟所倚爲臂助者也光緒九年秋
間臣檄調來直奏令募帶兩營駐守旅順口黃金山礮臺冬春以
後法事日棘敵船時有非來之信該總兵督率弁勇請求西洋礮
法昕夕徹備鎮定不擾黃金山濱臨大海其高約四十丈冬令風
雪凜冽砭人肌骨該總兵感受嚴寒漸患哮喘等證因海疆多事
常思立功自贖仰答
朝廷錄用之

恩故力疾馳驅不以爲苦上年帶隊護送朝鮮李是應回國該君臣深加敬禮商請王永勝移軍往駐漢城蓋其忠勇過往之氣實足感動人心而往來海東於彼都山川形勝尤極熟悉臣曾奏明堪備緩急徵調之選該總兵年甫五十有四方冀其爲

國宣勞不意痰喘日甚觸發舊傷遽於營次病故旅防諸將莫不痛惜失聲據四川提督宋慶等合詞請

奏優卹前來臣查王永勝久歷行間戰功卓著前於防護朝鮮案內奏請開復原銜已蒙

恩准茲因積勞傷發歿於旅順海防軍營以死勤事殊堪矜憫相應仰懇

天恩俯准將開復原銜已革遇缺題奏提督江西南贛鎮總兵王永勝開復原官准其附祀江蘇淮軍昭忠祠並照提督軍營病故

例從優議卹以旌前勞而昭激勸理合附片具陳伏乞
聖鑒訓示謹
奏

北洋月支礮費摺

光緒十二年四月初十日

奏爲北洋礮臺防營現在月支各項礮費數目分晰彙開清單恭摺仰祈

聖鑒事竊北洋各海口爲

京師門戶關係至重自光緒元年籌辦防務以來於天津之大沽北塘海口南北兩岸及石頭縫煙頭沽青坨寺小站等處山海關之甯海城鐵門關長龍崗奉天旅順口之黃金山餛頭山嶗嶸嘴老虎尾獼子營母猪礁等處擇要建設臺壘購置巨礮調撥淮勇及練軍各營分駐操防勤加演練以期精熟而資捍衛惟歷年所購礮位均係訪求各國新式擇其至精至利者不靳多金購運於數萬里外並延洋員爲之教習此種新礮運用之妙各有不同演放稍不如法擦修稍不加工機關動致損壞旣以重價購之不能

不倍加慎重也查西國定章於礮位及各項隨礮車具零件用之至精愛之亦備至凡礮管架座輪機子彈關鍵等項須隨時油飾修拭以防鏽露置臺牆稍有損缺亦須隨時整理用費在所不惜中國從前未經購有此等新礮應給前項礮費並無成例可循是以各項礮位購運到津督飭軍械所委員酌照西國辦法購用油紗器料勤加收拾將一月實在需用費若干以作礮費準則撥歸何處臺壘操用卽飭局按月給領礮位有大小之分故礮費亦有多寡之別均經核實支用俾得積久常新既爲利器所必需未便省此小費致成無用之物所有酌給各項礮費銀數歷年均照此核發由支應局司道等會詳請

奏前來臣查西洋新式各礮攻堅致遠洵爲戰守利器惟價值昂購辦非易自應時加珍惜大者安設臺牆小者馳逐行隊常暴

露於風日塵沙之中必積器物以磨洗之則用費萬不可省否則日久將歸廢棄所需有限而爲益甚大所有月支各項礮費數目理合開單恭呈

御覽伏乞

皇太后

皇上聖鑒敕部查照立案謹
奏

謹將北洋礮臺防營現在月支各項礮費數目彙開清單恭
呈

御覽

計開

克鹿卜二十四生脫口徑後膛鋼礮每尊月支礮費銀十二兩

克鹿卜二十一生脫口徑後膛鋼礮每尊月支礮費銀八兩

克鹿卜十五生脫口徑後膛鋼礮每尊月支礮費銀八兩

克鹿卜十五生脫口徑後膛田雞鋼礮每尊月支礮費銀八兩

克鹿卜十五生的密達後膛鋼礮每尊月支礮費銀八兩

克鹿卜二十四磅後膛來福銅礮每尊月支礮費銀八兩

克鹿卜十二生脫口徑後膛鋼礮每尊月支礮費銀六兩

瓦瓦司四十磅後膛礮每尊月支礮費銀六兩

克鹿卜十二生的密達後腔鋼礮每尊月支礮費銀六兩

克鹿卜十六磅鋼礮每尊月支礮費銀六兩

六十八磅前腔鐵礮每尊月支礮費銀五兩六錢

十寸半口徑前腔鐵瓶子礮每尊月支礮費銀五兩四錢

二百磅前腔來福鋼礮每尊月支礮費銀五兩四錢

一寸徑十管格林礮每尊月支礮費銀五兩

八寸五分半口徑前腔鐵瓶子礮每尊月支礮費銀四兩八錢

阿母斯脫耶一百二十磅前腔鋼礮每尊月支礮費銀四兩八錢

克鹿卜八生脫口徑後腔陸路鋼礮每尊月支礮費銀四兩五錢

克鹿卜七生脫半口徑後腔陸路鋼礮每尊月支礮費銀四兩五錢

錢

法國一寸半徑五管荷乞開司礮每尊月支礮費銀四兩五錢

克鹿卜八生的密達後腔鋼礮每尊月支礮費銀四兩五錢

克鹿卜七箇半生的密達後腔鋼礮每尊月支礮費銀四兩五錢

三十二磅前腔鐵礮每尊月支礮費銀四兩四錢

瓦瓦司六十磅子前腔鋼礮每尊月支礮費銀四兩二錢

六十八磅前腔鐵礮每尊月支礮費銀四兩二錢

克鹿卜七生脫半口徑後腔過山鋼礮每尊月支礮費銀四兩

二十四磅前腔銅礮每尊月支礮費銀四兩

瓦瓦司四十磅子前腔鋼礮每尊月支礮費銀三兩六錢

四十二磅前腔鐵礮每尊月支礮費銀三兩六錢

四分五徑十管格林礮每尊月支礮費銀三兩五錢

二十四磅前腔鐵礮每尊月支礮費銀三兩五錢

三十二磅前腔鐵礮每尊月支礮費銀三兩三錢

十二磅前腔銅礮每尊月支礮費銀三兩三錢

金陵機器局仿造六生脫口徑後腔熟鐵過山礮每尊月支礮費

銀三兩二錢

十二磅前腔銅礮每尊月支礮費銀三兩

九磅前腔來福鐵礮每尊月支礮費銀三兩

法國十二磅前腔輕銅礮每尊月支礮費銀三兩

二十四磅前腔鐵礮每尊月支礮費銀三兩

一百二十八磅銅田雞礮每尊月支礮費銀三兩

六十磅鐵田雞礮每尊月支礮費銀三兩

四分五徑十管迷泰來思礮每尊月支礮費銀二兩八錢

法國十二磅前腔鐵礮每尊月支礮費銀二兩八錢

上海機器局仿造十二磅前腔輕銅礮每尊月支礮費銀二兩八

錢

十二磅前腔六楞來福銅礮每尊月支礮費銀二兩八錢

十二磅來福開花銅礮每尊月支礮費銀二兩八錢

二十三分徑九磅前腔鐵來福開花礮每尊月支礮費銀二兩八

錢

十二磅前腔銅礮每尊月支礮費銀二兩八錢

四管格林礮每尊月支礮費銀二兩五錢

一寸徑四管神機礮每尊月支礮費銀二兩五錢

雙管格得納連珠礮每尊月支礮費銀二兩五錢

一寸徑那登費四管礮每尊月支礮費銀二兩五錢

十管格林礮每尊月支礮費銀二兩五錢

五分徑格林長礮每尊月支礮費銀二兩五錢

單管格林礮每尊月支礮費銀二兩

十八磅前膛鐵礮每尊月支礮費銀二兩

英國十二磅前膛鐵礮每尊月支礮費銀二兩

六十四分徑六十八磅鐵田雞礮每尊月支礮費銀二兩

十二磅前膛銅開花礮每尊月支礮費銀二兩

十二磅鐵開花礮每尊月支礮費銀二兩

金陵機器局仿造十二磅前膛鐵礮每尊月支礮費銀一兩五錢

四十二磅鐵田雞礮每尊月支礮費銀一兩五錢

二十四磅銅田雞礮每尊月支礮費銀一兩二錢

四十三分徑二十四磅鐵田雞礮每尊月支礮費銀一兩二錢

十二磅銅田雞礮每尊月支礮費銀一兩

十八磅田雞礮每尊月支礮費銀一兩

三千斤至五千斤洋莊礮每尊按季支礮費銀八兩

一千二百斤至二千斤洋莊礮每尊按季支礮費銀四兩

二千五百斤前膛鐵礮每尊按季支礮費銀四兩

一千八百斤前膛鐵礮每尊按季支礮費銀四兩

單耳短鐵開花礮每尊按季支礮費銀三兩

五百斤至七百斤洋莊礮每尊按季支礮費銀二兩

單管格林礮每尊按季支礮費銀二兩

六十八磅鐵田雞礮每尊按季支礮費銀二兩

二十五分徑前膛洋莊礮每尊按季支礮費銀二兩

五百六十斤至九百斤洋莊礮每尊按季支礮費銀一兩八錢

五百六十斤至九百斤單耳礮每尊按季支礮費銀一兩八錢

九百斤前膛鋼礮每尊按季支礮費銀一兩八錢

三十六分徑十二磅單耳洋莊鐵礮每尊按季支礮費銀一兩八錢

三十六分徑單耳前腔鐵礮每尊按季支礮費銀一兩八錢

三十分徑洋莊鐵礮每尊按季支礮費銀一兩八錢

十二磅銅田雞礮每尊按季支礮費銀一兩

三百斤至四百五十斤洋莊礮每尊按季支礮費銀九錢

二十二分徑洋莊鐵礮每尊按季支礮費銀九錢

二十四分徑洋莊鐵礮每尊按季支礮費銀九錢

二十分徑洋莊鐵礮每尊按季支礮費銀九錢

覆陳部駁海防報銷摺

光緒十二年四月初十日

奏爲光緒六年以前北洋海防報銷經部駁查各款逐一登覆仍請照銷恭摺仰祈

聖鑒事竊准戶部咨開光緒元年至六年北洋海防報銷案內臬司丁壽昌月支薪水銀二百兩道員鄭藻如許鈐身各月支銀一百兩知縣陸爾發月支銀五十兩提督丁汝昌月支銀一百兩嗣加爲一百五十兩游擊劉步蟾月支銀五十兩嗣加爲一百兩以無例章可循又無奏報案據均令比照核減又調津登榮水師艇船月支公費銀一百兩以奏調時並未隨摺聲明又未報部有案無憑核銷又直隸提督李長樂親兵小隊所支銀數雖與淮軍馬隊章程相符惟冊報並無馬隊字樣此外又月有馬兵二十四名則親兵非馬隊可知何以亦按馬隊支給礮費一項冊內並未聲

明每礮月支銀若干又新城練軍操用十二磅克鹿卜後膛鋼礮十六尊每尊月支礮費銀六兩此項章程係何時核定又礮船公所司事一名月給銀十兩夫役四名月各給銀三兩六錢月需紙張油燭等項銀六兩事屬可行係比照何項章程支給均令查覆核辦等因當飭據文應局司道逐一查覆前來臣查北洋自光緒元年遵

旨籌設外海水師講求洋務人材訪購新式利器以爲各省之倡當時規模未具並無成例成案可循西國水師強盛甲於天下中國欲求自強必須仿照西法斟酌損益其開支各項亦惟有量能授事實用實銷是以光緒元年戶部會同總理各國事務衙門奏撥南北洋海防經費摺內祇言由督辦大臣將用款數目咨報總署戶部查核初無如何立案分銷之文蓋因籌辦海防創設兵船

一切用款非他項軍需可比不能繩以常例也臣既任督辦凡用款數目不得不於撙節之中求有實濟隨時酌量批發本與他案他省例行事件不同亦不敢稍任目濫嗣於光緒八九年部中始定報銷新章令先奏明立案並分三部造冊但以前已用之款實係無從遵辦疊經聲明奏咨在案查薪水爲委員辦公之需總以差事煩勞爲斷北洋海防事體煩重非諳練各國水師規制熟習中外交涉事宜人員不足以供驅使該員等往還海口水陸交馳聯絡洋將一切舟車薪夫因公酬應之費較內地防務差使可以從容坐食者不啻倍蓰勢須量予優給卽如前臬司丁壽昌係以一人而兼數差一差而任數事僅此一分薪水辦公尙形竭蹶今其人久經物故若事後刪減追繳勢將因公受累殊非所以示體恤其餘員弁大率類是又訓練登榮水師艇船九號係仿照練船

之制令弁兵認真操習以備鐵甲碰快船之用該艇船領運餉械
一切需費爰照練船酌給每月公費其銀一百兩因在奏報核給
登榮水師薪糧以後是以未及隨摺聲明其時亦未有立案新章
爲數無多向准隨冊聲敘遂未先行報部以艇船九號而月僅支
公費銀一百兩實已力求撙節毫無虛糜又直隸提督李長樂所
募親兵原係馬小隊其薪糧等項皆照淮軍馬隊章程支給冊內
無馬隊字樣委係開報未能明晰此外另有馬兵二十四名係該
提督出防隨營之本標馬兵不在所募親兵馬隊之列所支各項
礮費內二十四磅後膛礮每尊月支銀八兩三十二磅前膛礮每
尊月支銀三兩三錢二十四磅前膛礮每尊月支銀三兩二十五
分徑洋莊礮每尊季支銀二兩三十六分徑前膛礮每尊季支銀
一兩八錢二十分徑洋莊礮每尊季支銀九錢自六年七月起至

十二月底止共應支銀二百六十二兩四錢現查銷冊內計多核銀二兩七錢一分五釐八毫九絲四忽四微係句稽錯誤應卽更正所有此項礮費並新城練軍操用克鹿卜十六磅後膛鋼礮月支礮費銀六兩均於所購各項礮位到後按照每月實需油紗器料等項用費隨時酌定亦因在新章以前未經先期報部頃已月行專摺補奏立案矣又礮船公所司事夫役月支薪費工食銀兩因軍火關係至重且遠在海濱食物昂貴所需薪工難以他項比照部臣亦謂事屬可行以上各款共應銷銀八千九百八十四兩六錢五分四釐四毫一忽一微五纖查戶部核覆光緒元年至六年洋員支款案內聲稱本部核銷各項總以例章奏案爲憑惟所復各節亦係實在情形以前用過各款應由該大臣自行奏明辦理等因今委員薪水等款事同一律均係實用實報無例可循毫

無浮冒相應仰懇

天恩敕下戶部照數准銷以清案款理合恭摺具陳伏乞

皇太后

皇上聖鑒謹

奏

洋員資費請准銷片

光緒十二年四月初十日

臣戶部核覆光緒元年至六年北洋海防洋員支款內稱各洋員所支薪水向無例章可循且事隔多年洋員已多遣撤回國所有支過薪水銀一萬二千八百七十九兩零又赴旅順口修築礮臺川資銀一百九十五兩應照數准銷嗣後北洋海防所用洋員可減則減其必不能裁減者亦應釐定章程何項差使爲煩何項差使爲簡煩者月支不得過若干兩所用不得過若干員簡者月支不得過若干兩所用不得過若干員先行報部立案如有增減隨時咨報又各洋員支過來帶回國川資暨安家一款其冊造銀一萬五千四百九十八兩零該洋員等既經中國雇募其來回川資暨安家銀兩自應給予惟數目參差不一應令詳細分晰另報併將海外各國距華孰遠孰近某國來華約需川資若干統行酌定

大概數目等因當以北洋創設外海水師本係仿照泰西成法意在取彼之長以爲自強之計所購船礮鎗械機器等項日新月異理法精奧中國素未經見其用法亦未諳悉以至精至利之器授諸不諳用法之員弁幾同廢物是以不得不借材異域雇募洋員來華教習以期一物得一物之用非好爲此糜費亦絕非冗員可比方雇募之初事屬創始無例可循薪水川資等項皆由原薦之洋員或各國出使大臣與之酌量商訂該教習等不遠數萬里而來所圖者利耳惟餌以重利彼方挾所長而樂爲我用且須視本領之高下以定薪資數目之多寡有於薪水外議給房膳旅費醫藥等項者有將房膳等項併入薪水內者有薪水在華全支或在本國留支若干以爲安家者各隨所欲得而斟酌允行辦法本無一定非若中國員弁供差以官階之崇卑事務之煩簡定薪水之

等次也其川資等項則又視其人用費何如其本領好而用費大者非多金不足以贍用故議給之數較多不能按照程途遠近以計其值緣該洋員等來華均須乘坐外國公司輪船其艙位有頭二三等之分其價值有隨時增減之別或於船價外另給在途薪費或將船價薪費併計在內總其名曰川資一經訂立合同即應照付亦不能由我預定數目中外交涉事件不得不因時制宜以前所雇洋員除酌留教習差委外已有限滿遣回者亦有限未滿遣回者委係可裁則裁可減則減嗣後如事關緊要必須添募應仍由原薦之洋員或出使大臣詳細選擇力求撙節並隨時咨部立案現實無從預定員名額數且借材係權宜之計自亦無須定額業將此情咨覆戶部並飭局將前項川資等銀分晰開列清冊咨送核銷在案茲准戶部覆稱該大臣所覆各節亦係實在情形

以前用過各款應自行奏明辦理等因所有光緒元年至六年月
過雇募洋員來華回國川資暨安家等銀一萬五千四百九十八
兩八錢六分三釐三毫四絲六忽一微均與外洋交涉實用實報
毫無浮冒相應仰懇

天恩敕下戶部照數准銷以清案款理合附片具陳伏乞

聖鑒謹

奏

移讓鐵池口教堂摺

光緒十二年四月二十八日

奏爲與駐京教士議定移讓北堂在西什庫地方改建酌擬辦法飭立合同仰祈

聖鑒事竊臣於上年九月面奉

皇太后懿旨飭派英人敦約翰前赴羅馬商請教皇令教士將內城鐵池口教堂遷移俾將商辦情形函達醇親王暨總理衙門轉奏在案本年三月二十九日據津海關稅務司德瑾琳送交敦約翰羅馬來電云教皇允移讓北堂並令駐京教士樊國樑速赴羅馬面詢移堂事宜務請將改移地方趕緊議定並如何改建之法訂妥等語當卽據情電奏旋准總理衙門四月初一日電復北堂移讓彼既允不建樓必須切實說定案一確據方准在西什庫地方建立教堂惟洋房與內地房屋迥不相同官爲修理有無窒礙

務當再行詳度至西什庫在

皇城西北本年方向不利即使說定移建今年不能動土亦應豫
爲議明避

旨電達等因臣遵卽密屬德琳琳函招該教士樊國樑來津妥議
一切據稱非堂最高處日鐘樓計八丈四尺茲旣蒙

恩准改建西什庫雖距北海尙遠然亦不敢過高擬造大堂自地
至樑以五丈爲度鐘樓斷不令高出屋脊是較非堂舊建之樓已
減三丈餘緣教堂規矩必有大堂俾資煥土禮拜誦經之所過卑
狹則不能容凡各口洋房均在五丈上下亦非獨異不致有礙觀
瞻將來造成時如連鐘樓測量若逾五丈以外情願拆平以昭誠
敬至改建一節該教士力求山官照原式代爲修造惟洋房與內
地房屋不同員匠旣非夙諳查其原堂規模闊大物料繁巨尤慮

依樣估修轉滋糜費應仍折給價銀由該教士自行起造臣初祇允給銀二十萬樊國樑堅稱不敷尙多續又遞允至三十萬彼仍求加給五萬據該教士呈出北堂房屋地基原圖並譯丈尺物件清單臣約略核計所費實屬不貲適醇親王莅津面與籌商以教士既願遷讓情詞恭順

國家亦不必過爲計較俾示大方可照三十五萬兩定議德瑾琳係中國海關所川人員應飭與樊教士訂立合同畫押爲據四月二十六日臣傳集德瑾琳樊國樑來署將所議合同五條面加釐訂查西什庫地方未知方廣丈尺若干該教士欲全行付給臣與再四駁議改爲將西什庫南邊地方酌給三分之二應請

飭下步軍統領地面官員早爲量度傳諭所有樹木輒石勿任損壞如有民居小屋在四至以內礙事者似應給資搬移俟屆冬月

交與教士收管庶免藉口又北堂所有百鳥堂內異方禽獸及一切古董物件鐘樓內風琴喇叭等據樊教士稱歷年多方覓購實費巨款各不欲與臣商令全數報效不准遷移短少該教士勉爲遵允因添載末條以免異日翻悔當卽照繕中法文令德瑾琳樊國樑各自畫押存案謹照譯合同恭呈

御覽樊國樑卽於二十七日起程赴羅馬該教士人尙公正素爲教會領袖據稱教皇必可批准法國亦無異詞彼至羅馬奉准卽速電知屆時臣接電後再懇俯准該教士合同所請明降

諭旨褒嘉以示觀感所有彼此屆期交付堂基物件未盡事宜應請由醇親王會商總理衙門王大臣派員妥爲經理其應分期付給銀兩由臣隨時會商海軍衙門總理衙門籌款付給以期仰慰聖厯至北堂鐘樓太高俯瞰

禁苑中外臣民久滋疑議歷經總理衙門屢商法國使臣飭令拆
改頑抗不遵此次醇親王暨臣等設法商辦竟能操縱如意實屬
始願所不及俟事成之日德琳琳敦約翰等忠誠效命及神機營
出力人員懇懇

恩施准予優獎合併附陳所有議移北堂酌訂辦法緣由謹摺
由驛覆

奏伏乞

皇太后

皇上聖鑒訓示謹

奏

照譯商訂合同

天津稅務司德理琳北堂教士樊國樑爲商議移讓北堂在西什庫改建酌擬辦法恭呈鈞鑒仍應祇候

大清國大皇帝大羅馬大教皇御覽批准謹遵奉行事計共五端詳列於後

一自光緒十三年正月初一日起以二年爲限凡北堂仁慈堂地基房屋及樹木等均於限內交付除傢具外一概不准移動損壞
二應請於本年十一月初一日將西什庫內南邊地方酌給三分之二丈量四至交與北堂主教收管該地現有樹木若干一併交付不可拆損移動

三查北堂地方係康熙年間蒙

聖祖仁皇帝賞給教士等居住並派員相助起建大天主堂又頒

發

敕建天主堂金字匾額中外同深欽感今因

朝廷欲廣築地教士等遵

敕移讓復蒙

賞西什庫內地方另爲建堂

朝廷厚澤深仁

後

先一轍教士等尤深感激應請奏明按照康熙年間辦法明降

諭旨俾中外咸知教士等永遠遵守則仰荷

恩寵益無涯涘

四如蒙查照康熙年間成法辦理頒發

諭旨教士等於西什庫新堂成後當照南堂式恭刊

詔旨於碑護以黃亭以漢白玉製闢以昭誠敬至在西什庫建造大堂自地至樑以五丈高爲度鐘樓亦斷不令高出屋脊

五此次在西什庫改建北堂教士等甚願官家按照北堂仁慈堂原樣代爲蓋造房屋一切均照原式是爲最要如官家不肯照樣代辦祇得由教士等畫圖自行起造此項工料銀兩應請於付西什庫地方時付給三分之一過六箇月再付一次又六箇月付訖分作三次爲時十八箇月似較輕便按此次月建北堂仁慈堂工料等項實需用至四十五萬餘金本中堂諭令核減教士等於無可減之中勉力酌減銀十萬兩計共需庫平寶銀三十五萬兩此係格外報效伏祈亮察

再北堂所有自烏堂內禽獸及一切古董物件鐘樓內風琴喇叭等獎教士願請教皇吩示概行報效奉送

中國國家

光緒十二年四月二十六日

再請劉步蟾等獎敘片

光緒十二年五月初六日

再臣前保出洋照料鐵艦工程並駕駛來華游擊劉步蟾等十員
上年十一月二十五日奉

旨著照所請欽遵在案旋准吏兵部咨開前定嚴核保舉章程各
省機器船政事務不准請獎應將此案奏明更正等因臣查部定
嚴核保舉章程所稱機器船政不准請獎係指內地各省尋常局
務而言其出洋人員係異常勞績並不在嚴核之列卽如出使各
國大臣隨帶員弁駐洋三年准其優保疊經循辦足爲明證今劉
步蟾等係專派赴德國照料定遠等鐵艦工程駐洋已逾三載朝
夕在廠監視研究製造理法勞苦備營工竣後又同德弁駕駛來
華遠涉風濤數萬里俱臻平穩實屬奮勉出力與光緒七年駕駛
英廠所造兵船來華准獎員弁情事相同較出使隨帶員弁作辦

交涉文案等事准其優保者有過之無不及也現值創辦海軍添
造戰艦講求製造駕駛必須及時鼓舞莫可人材輩出日起有功
苦往返重洋頻經艱險辛勞久著之員照章應得獎敘忽欲比照
內地尋常局務靳而不與非特顯與出洋准獎成案兩歧且無以
感發人心奚能收指臂之效該員劉步蟾等材藝既堪造就勞績
實邁尋常原保毫無冒濫相應仰懇

天恩俯准敕部仍遵前奉

俞旨給獎註冊以昭激勸庶於海軍大局有裨其咨獎千把各弁
前已咨部合併聲明理合附片陳請伏乞

聖鑒訓示謹

奏

請緩鹽課奏銷摺

光緒十二年五月初六日

奏爲援案請緩長蘆本屆正課奏銷以恤商艱仍無誤協撥京奉各餉恭摺仰祈

聖鑒事竊據長蘆鹽運使李邦楨詳稱蘆商正課例限五月奏銷自同治十年後商情艱窘節經

奏准緩至十月啟徵茲已例限將屆催令各商完納據通綱督商等一百二十六商稟稱直豫災歉頻仍元氣未復引鹽銷滯商本虧賠十數年來蒙將正課展緩藉可先顧春秋兩運仍於秋運後趕緊完課並未誤解餉期限近年且較厯屆增交銀數有裨餉需實因奏銷時日稍紓始得勉竭商力今奉催照例限完課苟能遵辦以收瀆求惟當春運喫緊已運者尙未抵岸銀不能回未運者須速措資本以付鹽價運腳其上年欠課及未完帑利並應設

法完交情形已甚竭蹶商疲累太多能於五月內兼顧課運者
百無一二全指秋後回標以完課款此時實萬難兼顧懇將本
屆正課奏銷援案展緩該運司詳加體察確係實情若令依限完
納必致力不能支從事參追無裨實際請緩至十月啟徵仍無誤
京各餉聲明永屬鹽課奏銷應屆時隨同辦理方可彙計分數
等情具詳前來臣查展正課前因商情艱窘奏請展緩均
已奉

旨允准但可依限催納豈容稍事稽延惟商累已深刻值告迎喫
緊實難兼顧課款相應援照歷屆成案籲懇

天恩俯准將光緒十二年正課奏銷緩至十月辦理以恤商艱卽
以保全課帑屆時當督飭運司認真催徵將本撥京各餉仍於
年內解清斷不敢稍任遲誤理合恭摺具陳伏乞

皇太后

皇上聖鑒訓示謹

奏

奏保左寶貴片

光緒十二年五月三十日

再統領奉軍記名提督直隸廣平營游擊左寶貴由行伍出師南北各省補授游擊保升副將光緒元年調赴奉天疊次蕩平大東溝各處積匪率

旨以提督總兵記名

賞給勇號並翎管等件嗣辦理善後於哈力套改及建昌朝陽一帶勦撫兼施迎寇就戮奉

旨優敘嘉獎旋統領奉軍赴營口籌辦海防修築礮臺營壘歷任將軍以該員堪勝專閫節經奏保有案本年二月赴部引

見奉

旨交軍機處記名遇有提督總兵缺出請旨簡放欽此茲據稟請開去游擊底缺前來臣查該員左寶貴勤明忠實驍果耐勞曉暢

軍事謀勇兼優歷年防勦出力資勞甚深允爲

陪都保障足備干城之選應請開去廣平營游擊底缺仰懇

天恩仍以提督總兵存記遇缺儘先簡放以屬將才所遺廣平營

游擊係部推之缺應用儘先人員查有直隸儘先補用副將聶桂

林貴州松桃廳人現在奉省管帶練軍該員辦事勤奮熟諳操防

應請借補廣平營游擊亦與定章相符除將各該員履歷分咨軍

機處兵部外理合附片具陳伏乞

聖鑒訓示謹

奏

宋慶裁軍薪餉片

光緒十二年五月三十日

再據四川提督宋慶文稱所部毅左軍四營新勇上年遵

旨裁撤除發過九月以前月餉外核給十一兩月薪餉俾資路

費今由河南轉准部咨須減給一月勢難循照等因臣查毅左軍

員弁勇夫係上年九月底十月初撤遣均籍隸皖豫距駐防之旅

順口相隔數千里時值冬令雨雪載途若不酌發川資難免流離

生事經臣奏明核給十一兩月薪餉遴派員弁沿途押送始得

安靜回籍據員弁回稱僅敷到家用度並無盈餘向來年久出力

弁勇撤遣應發數月額餉使其到家後尚有餘資營生今因新勇

成營未久祇給路費實已力求撙節難再核減且該弁勇等早已

遣散亦無按名追繳之理此項係由節存項下湊發其部餉卽裁

至十月分止並未多領應請仍照臣原奏辦理以免紛更而示體

恤除咨河南撫臣外理合附片具陳伏乞

聖鑒敕部查照謹

奏

張樹聲原籍建祠片

光緒十二年六月二十日

再前因已故兩廣總督張樹聲勳勞卓著遺愛在民臣據直隸紳士公呈並撮舉災中戰績奏奉

諭旨准於直隸江蘇立功地方建立專祠咨行欽遵在案茲據安徽廬州府合郡紳士江蘇題補道吳毓芬等三十人聯名稟稱咸豐三年以後粵逆竄擾皖北廬郡一帶土匪蠭起內外交訌幾致不可收拾經張樹聲與其弟原任廣西右江鎮總兵張樹珊毀家紓難倡辦鄉團擒治土寇復率練勇出境剿賊疊克含山六安英山霍山潛山太湖無爲等州縣太湖一役以五百人當前敵破逆酋陳玉成數萬之眾嗣桐城官軍潰退廬郡失守粵賊到處裹脅焚殺捻逆襲張孫苗諸大股往來肆擾張樹聲嚴申禁令不准鄉民從賊先平肥西匪寨繼敗捻酋張洛刑於官亭就周公山下墜

築堡寨阻河爲險陳玉成又率悍賊兩次圍攻皆設計敗之遠近
極負來歸之民咸知其制寇有方相依爲命力行堅壁清野之法
張樹聲與諸團民講信修睦聯絡援應如劉銘傳周盛波周盛傳
唐定全等皆同時築堡禦賊百數十里閉寨壘相望耕戰相資屹
立賊數中六七年南仇粵逆非拒捻氛大小數百戰斬馘無算厥
後練成淮軍勦平粵捻實由此立其基張樹聲以一諸生倡率忠
義文挂艱危罕有其匹迄今父老追思往往隕涕惟原籍祀典尙
缺請一體建立專祠以資報享等情前來臣查軍興以後有功桑
梓諸臣皆蒙

恩准於原籍建祠近如已故將軍富明阿經吉林紳士呈請入奏
亦蒙

俞允張樹聲於咸豐年間在原籍號召鄉人倡辦團練勦築堡寨

悍挫兇敵方張之寇使六七年中百餘里閉城不敢逞其保全桑梓捍衛地方厥功甚偉其時正在皖省軍營從事得親見知之甚詳今該紳士等聯名籲請出於愛戴至誠未忍聽其湮沒相應仰懇

天恩俯准將已故兩廣總督張樹聲在原籍合肥縣一體建立專祠由地方官春秋致祭以彰盡績而順輿情出自逾格
隨施理合附片具陳伏乞

聖鑒訓示施行謹

奏

奏付洋息摺

光緒十二年七月十八日

奏爲東海關奉派攤還神機營前借洋款暫於洋稅招商局稅六成二成項下儘數湊付息銀其原派京餉並津軍月餉無款撥解恭摺仰祈

聖鑒事竊准戶部咨開神機營息借洋款奏令江海津海東海江漢各關按期歸還一摺奉

旨依議欽此計津海東海兩關光緒十一年應還第一年兩期利銀各一萬餘鎊按每鎊三兩五錢合三萬五千餘兩十二年至十六年每關每年各應還四期利銀二萬餘鎊合七萬餘兩十七年至二十一年每關每年各應還四期本利六萬數千鎊至七萬數千鎊合銀二十餘萬兩仍由江海關隨時照外洋鎊價長落合銀付給等因當經分飭遵照已先將津海關辦理情形奏報在案茲

據東海關道方汝翼詳稱除上年八月第一期利銀業由神機營墊付應照部議陸續設法解還外其上年十一月第二期及今年二月五月第三四期又九月十二月爲第二年第一二期利銀按戶部原奏每期僅合銀一萬七千六百四十兩惟疊接江海關來咨外洋鎊價增長第二期應添撥銀二千四百七十餘兩並月給怡和洋行先期墊付利銀三百五十餘兩第三期應添撥銀二千五百十餘兩第四期應添撥銀三千一百八十餘兩是按現在鎊價每年四期必須銀八萬數千兩較部文七萬餘兩實加多一萬數千兩查該關洋稅招商局稅每年收數統其不過二十萬餘兩洋稅向分四成六成招商局稅則提出二成其餘亦分四成六成所有洋稅招商局稅四成銀兩係專撥天津機器局經費其六成銀兩內提一成半解充出使經費又應坐支稅務司薪水

本關經費下餘六成銀約僅八萬兩除解京餉銀二萬五千兩抵
閩京餉銀五千兩照額應解津軍月餉銀六萬兩近年祇能解五
萬兩以上款關緊要而機器局經費津軍月餉皆必不可少至洋
藥釐白沙遜洋行開歇生意蕭索收數無多新章加增釐金益覺
本重銷滯進口箱數寥寥本年自正月至五月僅收銀七千數百
兩尙不敷泰安輪船經費之用此該關稅釐入不敷出之實情也
奉派攤還神機營原借洋款無論光緒十七年以後每年本利
銀二十餘萬兩爲數更鉅斷斷無此力量卽現在每年八萬數千
兩之利息亦實無米爲炊惟洋商索款甚急又未便延欠失信祇
可暫將應解京餉津軍月餉之洋稅六成招商局稅六成二成銀
兩不拘舊管新徵儘數湊撥計已撥過三期解交江海關彙付惟
京餉及津軍月餉無從籌措應請改撥至今年應還四期並帶還

上年一期共五期計在十萬兩以外又不止八萬數千兩等情具詳前來臣查東海關經徵洋稅招商局稅每年不過二十萬餘兩其出入款目疊經詳細奏報部中按籍可稽向來除六成項下撥解京餉出使經費及稅務司薪水本關經費外應以四成銀兩專撥天津機器局爲製造各路軍火要需所餘六成銀兩撥交天津支應局搭放大沽北塘海口各礮臺練兵月餉歷年因解不足數是以機器局則添請部發月款支應局則截留保定練餉又因練餉不能再截遂酌撥長蘆鹽課湊放蓋機器局經費與練兵月餉皆係拱衛

畿輔根本待支緊急萬難缺乏今該關於左支右絀之中又奉派攤還洋款誠如方汝翼來詳無論十七年以後每年本利銀二十餘萬兩斷斷無此力量必須由部改撥卽現在八萬數千兩之利

息今年且需十萬餘兩亦實無米爲炊茲以洋款不可失信暫將
應解京餉津軍月餉之洋稅六成招商局稅六成二成儘數湊撥
實出於無可如何除京餉應由部另籌外其額解天津礮臺練兵
每年餉銀六萬兩實解五萬兩現在該關已無款撥解但軍士嗷
嗷待哺何能枵腹荷戈惟有督飭支應局司道暫行竭力挪墊若
至津局墊無可墊力難久支祇可照案請由部另行籌撥以顧要
防而免貽誤所有東海關奉派攤還洋款緊要暫於洋稅招商局
稅六成二成項下湊付息銀應撥京餉及津軍月餉無款撥解緣
由理合恭摺具陳伏乞

皇太后

皇上聖鑒敕部查照謹

奏

官剝船仍請津貼摺

光緒十二年七月

奏爲官剝船戶苦累前請由南省酌貼工食實較部議例定銀數有減並非格外加增仍請照前奏貼給以裨漕運恭摺仰祈聖鑒事竊臣前因官剝船戶窮極滋弊例定工食銀十五兩僅領一半不敷贍家餬口請自今年起每船由蘇浙漕項內酌貼工食銀五兩奉

旨著照所請戶部知道欽此業經咨行欽遵在案茲准戶部咨開定例封河守凍期內每船給工食銀十五兩又每船每年給油艚銀五兩三年給小修銀二十兩又每運米百石給腳價銀八兩四錢零食米一石一斗五升同治七年請籌給耗米同治十年請每百石加腳價銀五兩應次已格外周恤今請加每船銀五兩應無庸議等因臣維部議剝船戶既領工食油艚修費又有腳價食耗

米統計爲數似多故謂無須再加然逐項分計所得實屬有限且此次係酌復工食辦法亦非例外加增請得而詳陳之查油艚修費係爲補葺官剝之用非船戶所得自私況軍興以後人工物價皆昂又將十年滿料改爲十五年船身厯久朽敗修費益重例領銀兩不足尙須貼補並無絲毫餘賸至同治七年籌給耗米每百石祇五斗七升五合迨奏明歸南省自行運通亦與船戶無涉此皆應剔除未可併計者其所得惟工食腳價食米三項從前封河守凍期內實領工食銀十五兩向於鹽商捐款東綱生息項下動支本無折扣凡運米到通係由經紀承交既不賠米更無浮費所得腳價除去沿途用項儘有盈餘且商貨暢行酒後攬載獲利是以尙不爲苦嗣因長蘆山東綱情疲累商捐生息收數無幾將工食減發銀七兩五錢而交米並賣之船戶遇有短缺與經紀各半

分賠查南糧由海運津難免略受潮氣沙船行程遲緩米久儲倉
鹹水外漬尤慮閒有蒸變是以剝船受兌到通往往須下地風瞭
踐踏拋灑並有附近窮民偷竊此中傷耗不少既須賠補其船上
添置繩纜器具鋪船席片梳稽沿途加雇緯夫並通壩卸米腳力
風瞭人工及一切守候意外之費尤屬不貲每洪斛百石僅例領
腳價銀八兩四錢零食米一石一斗五升實不敷賠補傷耗及各
項開銷幸有同治十年奏加腳價每百石銀五兩藉補運費之不
足然每年運米三次所餘之項與工食併計約不過十餘兩每船
水手眷口七八人一年衣食悉在其內焉能足用又值連年荒歉
商貨稀少攬載寥寥遂致號饑號寒貧窘日甚臣目擊其困憊情
狀又據紛紛苦求勢不得不量予調劑查從前每屆虧短漕米至
數萬石之多羈押船戶至數百名之眾津通兩處逐日追比血肉

橫飛亦未有實濟。設法整頓嚴飭南北運員實力稽查不准偷盜。又加給津貼若干。去今兩年竟無虧短。實已著有成效。該船戶既不敢作奸犯科。而又明知其資生乏術。若不稍示體恤。無以得情法之平。難保其不復萌故智。商之倉場侍郎及蘇浙糧道意見相同。遂有酌貼工食之請。亦緣例定工食減至一半。僅給七兩五錢。實發之數太少。本應復額。祇以直庫無款可籌。蘇浙漕項恐難多撥。故僅議貼給每船銀五兩。實較部議每船例給工食銀十五兩之數。仍減銀二兩五錢。既未規復原額。更非格外加增。且必俟該船最後一次運竣如無顆粒短少。始由蘇浙局員查明自行核給。否則扣留不發。約計每年每省不過分攤銀數千兩。懸此以爲賞罰之的。俾可觀感。舊興仍嚴飭運員實力稽查。以冀不再虧短。如敢玩違。盡法嚴辦。南省既無籌補之累。正供卽免缺乏之虞。

實於漕運大有裨助目前摺已聲明嗣後不准於此外再請增給明示限制亦無虞踵行不已相應仰懇

天恩俯念此係酌復工食辦法實較部議例定銀數有減並非格外加增

敕部仍遵前奉

俞旨自今年起每船由蘇浙漕項內貼給工食銀五兩以裨漕運免累窮民再今年銀兩已據蘇浙糧道詳報於奉

旨後欽遵發給亦無再向窮苦船戶追還之理理合恭摺覆陳伏乞

皇太后

皇上聖鑒訓示謹

奏

代造剝船請改部議摺

光緒十二年七月

奏爲直隸代造江西剝船部議價既不敷款又無著實難照辦恭摺仰祈

聖鑒事竊准戶部咨開江西應造剝船四百三十四隻內三百隻應於今年伏秋汛渡黃解津其餘一百三十四隻於來年渡黃解津該省以由江排造費用倍增限期難赴請照歷屆成案由直隸代造部議准行惟仍指東綱生息銀兩應用並令照江西例價每隻工料銀祇二百三十四兩三錢零等因當經轉飭天津道籌辦茲據該道胡燏棻詳稱部議每隻祇給銀二百三十餘兩係爲慎重度支起見當此帑項支絀苟可勉強承辦敢不仰體時艱力求撙節無如統盤核實計算價既不敷且由東綱生息指撥款又無著萬難措手誠恐明歲新漕運橋北上官剝不敷承運勢必貽誤

不得不據實直陳查定例內河剝船應由江廣等省承造原以南
省係產木之區取材鳩工一切省便若因限期急迫南省趕造不
及議由直隸代辦本屬一時權宜之計同治五年前督臣劉長佑
奏造剝船案內以直省原乏醇練工匠須招商認辦每隻工價一
切合庫平銀三百九十六兩五錢零又商人遠出購料照江廣運
船水腳每隻酌給一半盤費銀二十兩其合庫平銀四百十六兩
五錢零江廣例價二百三十四兩運直水腳四十兩公攤津貼二
十六兩共銀三百兩雖直隸較江廣多用銀一百十六兩五錢零
實已節之又節勢難再減等語當經戶部覆准照辦嗣後直省代
造剝船均卽照案核推原直省工價較南省加增之故一因北
地向無木植必招商由閩廣采辦近年木料昂貴每遇遠商采買
尤必擡價居奇其需用鐵葉灰斤桐油無一不取資鄰省加入運

費價值卽昂一因津郡船匠稀少遠方寬雇工資不能不優是以
歷次代造均照此數開支部中亦明知難減折從未以南省例
價相繩者此次江西承造剝船議由直隸代造自應仍照歷屆價
值方可辦理今奉飭按照江西例價開支不但與歷屆直省代造
之數相去懸殊較南省自行造辦之數亦大爲核減詳經部議似
以直省代辦較南省多至一百數十兩不無浮冒惟南省例價雖
祇二百三十四兩五錢零加以運費四十兩津貼二十六兩已需
銀三百兩其實此係報部之數外銷津貼之款尙不在內約計共
需四百數十兩又況運船北來例准帶貨二成往往船戶所帶之
數倍徙於所准之數水手千數百人沿途恃強關越關卡偷漏稅
釐委員力難禁止視爲畏途其偷漏稅釐動則數萬公帑不無暗
耗閭閻亦爲騷動此南省所共知亦有歷次公牘可考且自南至

北計程數千里經歷長江黃河風雨剝蝕波浪衝激水手因販賣貨物節節逗遛時過久船身多半受傷到津之後尙須籌款大加修驗方可供剝種種糜費不一而足直省代造價值名雖加增實則減省既免船身耗敝又保各省稅釐裨益公家不少孰得孰失不待煩言此江西等省因自造費用倍增或外銷款項難籌屢欲直隸代造之實情也至歷屆直隸代造江西剝船均由江省將漕項銀兩預期籌解是以購料鳩工尅日可以集事今部撥東綱生息雖係造船本款然遠年陳欠久已虛懸無著直省一經代造立須招商認辦先發八成實銀以便封河前由海道販運木料勒限年內完工方免遲誤昨聞邸鈔前項息銀已經山東撫臣奏明每年祇能籌解一萬兩以三年三萬兩爲度是部撥十餘萬兩斷斷不能足數非空文所能強迫卽三萬兩須分三年解清亦屬緩

不濟急直隸著名瘠苦庫儲奇絀萬無餘力墊辦更無外銷津貼之款非照成案開支則價值實難敷用非有現銀籌解則辦理仍屬空言現在爲時已迫懇據楊村廳詳稱本屆漕後尙有滿料剝船三百隻應行裁除船身朽壞已甚無可挑留來年剝船祇存一千四百隻較額設短至一千一百隻近來南省漕米逐漸加增即使新船如數造齊尙恐不敷輪轉若再短缺則船少米多勢必停運待剝南船亦不能回空關繫實非淺鮮設因轉運遲延米色蒸變貽誤正供何敢當此重咎惟有據實詳請

奏辦前來臣查該道所詳皆係實在情事關漕運大政急需剝船應用勢難遷就貽誤相應請

旨敕下戶部迅速改議此次江西剝船既令直隸代造應仍照歷屆成案價值開支一面飛行江省務於八月內照數籌解現銀來

直以便招商趕辦俾供明歲春酒之用臣當督飭該道格外核實辦理儘能節省若干卽行解還部庫斷不任稍涉浮冒儻部臣必執前議直省實無從賠貼巨款祇可仍令江西自行迅速排造惟目下已屆秋令卽使該省年內巡竣亦斷不能於冬春飛渡黃河北來應如何另行設法不誤春酒剝運之處尤賴部臣統籌全局預先核示以便遵辦理合恭摺由驛具陳伏乞

皇太后

皇上聖鑒訓示施行謹

奏

津關部款緩解片

光緒十二年八月

再准戶部咨粵海等關前解抵閩京餉業經期滿今改為加放俸餉銀兩自光緒十二年正月起仍令按結提解部庫計津海關於六成洋稅項下每結提銀五千兩如六成不足在四成項下湊解其欠解抵閩京餉並應陸續籌解等因當經轉行去後茲據該關道周馥詳稱該關所收洋稅連招商局稅每年至多不過四十餘萬兩向以四六成分計四成稅銀專供天津機器局為製造各路軍火之用六成稅銀除提出使經費稅務司薪水本關經費外其餘儘數解歸支應局專供大沽北塘各海口礮臺防軍月餉之用歷年收不抵支甚形竭蹶是以機器局則請部撥月款支應局則借保定練餉及淡提運庫鹽課以應其急可知津海關於專撥本口餉需尙多短缺實無餘力供解他款也上年冬間已奏請將該

關奉派東北邊防餉及抵閩京餉緩解部議本年五月以前批解但庫空如洗實難爲無米之炊今年春閒又添派代還神機營息借洋款本利銀一百五十七萬餘兩分作十年還清計光緒十七年至二十一年本利兼還爲數過鉅已奏明斷無可籌其本年至光緒十六年每年應還息銀七萬餘兩加以鎊價日長每年須加銀一萬餘兩本年又應帶還上年利銀二萬餘兩共需銀十萬餘兩雖奏明准用洋藥釐金及湊撥洋稅招商局稅而不敷仍鉅是津海關從前奉撥抵閩京餉及本年派還洋息等款較歷年徵收稅數逾額已多部中皆有案據可考茲又令於洋稅項下仍照前撥抵閩京餉之收每結提銀五千兩改爲加放俸餉其前欠銀兩並令補解無如所收關稅久已入不抵出原撥抵閩京餉歷經奏緩奉部核准前既無款可解茲更添派洋息出款倍增又何從月

籌巨款查製造經費防兵月餉皆關近畿海防要需一日不可或
缺否則仍必另請部款至派還洋息亦刻不容緩儻經逾期又須
利上加利均不能挪作他用所有自今年起新撥加放俸餉銀二
萬兩以及欠解東北邊防餉抵閩京餉祇可請俟歸清洋息之後
洋稅如可挪湊再行分別酌解等情具詳請奏前來臣查該關既
有專撥製造經費防兵月餉要款又奉添派代還神機營洋債息
項爲數甚鉅不得不先其所急稅收尙不敷用實無力再顧他款
況值地方大水災廣賑繁度支萬分竭蹶稅收更恐短絀焦慮莫
名相應仰懇

天恩准將該關新派加放俸餉及欠解東北邊防餉抵閩京餉緩
俟洋息歸清以後再行酌解以免顧此失彼貽誤要需理合附片
陳請伏乞

聖訓示敕部查照謹
奏

李文忠公奏稿卷五十七